



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma :



Tir Yimym



tiryimym@aolima



tir yimym

TAPAK 8

Philippines anentsüh
lendong nung asür 15 jungogo

Anurag Thakur-i Testing Centre for
Health Supplements lapoktsü



VOL. XXI ISSUE NO. 118 (ADOK 118) DIMAPUR

KÜPTOKNÜ (SATURDAY)

TSÜKLAI (FEBRUARY) 10, ₹ 5.00

NLA Speaker-i BAC senden ayonger

Dimapur, Tsüklai/February 09 (TYO): Speaker, Nagaland Legislative Assembly aser Business Advisory Committee (BAC) indang mendenpuba Sharingain Longkumer-i BAC senden February 20, 2024 anüingdang 12:30 ako nung ayongzüka lir.

Iba senden ya Committee Room, Assembly Secretariat nung amentsü, kong February 26, 2024 nungi tenzüksü aliba 14th Nagaland Legislative Assembly indang Fourth Session atema Provisional Programme yanglutsü, ta sangdong ka ajanga ashi.

DC Wokha-i mokdang anena atatsü ayongzüker

Dimapur, Tsüklai/February 09 (TYO): Deputy Commissioner, Wokha, Ajit Kumar Ranjan-i Wokha District kübok civil society organization tem dang mapang telatet makai mokdanga aliba anena atatsü ayongzüker.

agütsüba kü indang office tongogo, ta shia liasü.

Mapang shidak nung mapa metenzükra contractor anema tapet mera agitsü ta shiti nung shia lir, ta DC Wokha ajanga ashi.

Department ajanga tapet mera agir asünung CSOs dang mapang telatet makai mokdanga aliba anena atatsü ayongzüker, ta Deputy Commissioner Ajit Kumar Ranjan-isa ashi.

Lotha Hoho mendenpuba dangi shiti ka züluba nung, anogo ter tsüingta mapa inyak tenzüksü totuyuba ka Chief Engineer, PWD (NH) ajanga contractor nem

Nagaland sorkari FMR atema civil societies den senden amentsü

Kohima, Tsüklai/February 09 (TYO): Indo-Myanmar arütsü nungi Free Movement Regime (FMR) agientsü Government of India-i telemtetba agiba atema kin balala nungi lokti tentet aser civil society balala den sorkari tekeraba nung senden amentsü, ta Nagaland indang Deputy Chief Minister, Y Patton-i tanü ashi.

amentsü ta ashiba dak alaka anogo tejangja mashi.

Yashi Civil Secretariat nung aliba Agriculture Department Nagaland indang Administrative office nung Central Bureau of Investigation (CBI) ajanga meita bushiba indang asüngdang dang, Dy. CM Patton-i iba indang kecha memetet ta langzüa liasü.

CBI ajanga bushisüingdangba ya 2023 küm December ita Delhi airport nung Nagaland sorkar ketdangsur aseme sen crore aika bener lia apuba indang lir ta osang kar ajanga ashir.

Department nungi iba osang tali tejangja asüngdangyatsü merang saka telangzüba kecha mali.

Phek District kübok Chozuba nung Chakhesang Wrestling Meet 2024 nung adentsü lia osangbener den jembidang, iba ken o atem yashi state cabinet senden ka menogo aser civil societies aser tribal bodies tem den shisadokden senden amentsü lemtet, ta Patton-i ashi.

Ajisüaka pai tekeratiba nung

Nagaland Finance & Accounts Service Association mungdang tenzükogo



Directorate of Treasuries and Accounts indang Conference Hall nung February 9, 2024 nü Nagaland Finance & Accounts Service Association pur 16 buba General Conference alidang tangokba noksa ka yangi angur.

Dimapur, Tsüklai/February 09 (TYO): Nagaland Finance & Accounts Service Association pur 16 buba General Conference sentong Directorate of Treasuries and Accounts indang Conference Hall nung February 9, 2024 nü tenzükogo, kong tesemdang tongti Principal Director, Treasuries & Accounts, R.N Yanthan liasü.

Iba sentong nung jembidang, state sorkar nung Department of Treasuries & Accounts ya tenük telen tongtipangtiba lir aser iba department ajanga 'financial rules and regulations' ketdang asür, ta Principal Director, R.N Yanthan-i ashi.

Directorates, District Treasuries, Sub Treasuries aser Department aser danga institution ajunga nung Audits nung 'fiscal discipline' wazüka ayutsü asoshi

ketdangsurtem dang tongti shilem agitsü ayongzüka liasü.

Expenditures Accounting heads nung double entry malitsü mechi civil deposit system aser Accounting Management ya tekeraba nung bentettsüla, ta Yangthan-i ashi.

State sorkar nung inyaker indang service book, pay slip aser pension inyakdang Accountant General indang office nungi record documentation shidak bendena ayutsü nungdaker, ta pai ashi.

Nagaland Finance & Accounts Service Association tir Vechiso Chakheasang-i iba sentong nung jembidang, iba Association ya 1978 küm tenzük aser mezüngbo committee ka dang liasü aser Department ya Finance department kübok liasü, ta ashi.

Mezüngpur aser senior officers temi mapa tajung inyaka Department aser Association amenoka ainba nung tongti shilem agiba atema pai tetushi agütsü.

Department of Treasuries and Accounts ya 1980 küm amenok aser tanü Association nung züngsem 207 lir ta pai metetdaksü.

Pai Finance department aser Directorate nung ketdangsurtem dang züngsemtem asoshi training sentong balala ayongzüka system tasen angazükdaksütsü ajungshia liasü.

Iba sentong nung menden ya Nagaland Finance & Accounts Service Association indang vice president T. Khekaho Aye liasü aser Director, Treasuries and Accounts, Vahine Thisa-i melepzüng o jembi.

CM Rio-i White Owl Literature Festival & Book Fair semzüktsü



Chief Minister Neiphiu Rio-i February 9, 2024 nü Plaza Zone Niathu, Chümoukedima nung mezüngbuba White Owl Literature and Book Fair nung jembidang tangokba noksa nung angur.

Dimapur, Tsüklai/February 09 (TYO): Chief Minister Neiphiu Rio-i February 9, 2024 nü Plaza Zone Niathu, Chümoukedima nung mezüngbuba White Owl Literature and Book Fair semzükja liasü.

White Owl Literature Festival and Book Fair ya The White Owl Book Lounge, Cambridge University Press aser Penguin Random House India lungjemer ayongzüka sentong ka lir.

Kaket azüngtsü tejangraba aser state nung otsü ashiba yimya tajung tanaben shia arudaksütsü nükjidong nung iba benjongmung

ya "Echoes of Narratives" omen nung ajemdaker ayongzüka lir.

Iba sentong nung tongti tesemdang ka ama jembidang, The White Owl, Penguin aser Cambridge University Press lungjema ajanga literature festival aso aser iba ya northeast India nung otsütsü mapang ka lir, ta Rio-i ashi.

Alima nung trade aser academic publishers tulutem rongnung ka ta züngshiba Penguin aser Cambridge University Press külemi inyakba ya kin balala lungjemdaksüba nung zülubanglu dak tashi aliba

sayur aser jangratemer, ta pai ashi.

Ano asüng aser yanü iba sentong nung sensaksemba, shisa lemsatepba aser tangatetba lemsatepba ajanga asenok tangatetba ulushitsü aser takum nung zülubanglu ajanga tongti shilem agiba tali angatetsü, ta ashi.

Yaküm iba benjongmung omen "Echoes of Narratives" yagi Nagaland nung literary heritage tali awajemtsür. Asen sobaliba tajung ya tebang o aser züluba nung angur aser otsü ashiba yimya yagi asenok

sendaktepsür, ta CM Rio-i ashi.

Tarnunger otsü aser ken ajanga oral literature tali jangjatsür aser ibai kanga senti lir, koba ajanga ojang züluba metenzükdang mapang den asenok sendaktepsür. Asen oral literature wazüka ayutsü aser amshitsü kanga tongtipang, kechiaser otsü ashiba ajanga asenoki asen sobaliba wazüka ayur, ta pai ashi.

Iba benjong ya ajanga lanurtemi tali azüngtsü, tali zülutsü aser asen zülubanglu bendena aser wazüka ayuba nung shilem agitsü asoshi ajungmesotsü imlar, ta pai ashi.

Iba book fair ajanga kaket azüngtsü yimya adokdaksütsüla aser osangtsüsang ya kaket nungi dang magizüki angatetsü merangtsüla, ta ashi.

Kaket azünger, zülur aser shisadangertem anitetba atema pai The White Owl Literature Festival indang Festival Director aser The White Owl Book Lounge kibur Viketuno Rio nem CM Rio-i tenüngsang agüja liasü.

Educators, kin balala nungi

nüburtem aser tila tanurtem den anibelem mesasai inyakba den külemi lai book fairs balala ayongzüka school aser college tem sendaktepsür, ta pai ashi.

Nagaland nunga küm ishika tsüingta published writers aser authors tem adokba angur aser The White Owl Literature Festival and Book Fair yagi kaket zülurtem ajangzüktsü asoshi sentong balala bushiba nung teyari alitsü, ta ashi.

Naga nunger kaket zülur, tashi temeteter dem sensaksemba ajanga tarutsü nung putu balala, sobaliba balala tsüingta tesendaktep tali akangshitsü, ta CM Rio-isa ashi.

Sangro mejemer, kaket zülur aser Hindu Literary Prize angur Easterine Kire-i iba sentong tenzüka jembidang, asen otsüla-oboula nunger ya asen yimsüng puti otsü ashir, sangro, oshiooben aser sobaliba indang otsü ashirtem liasü aser kaket zülur temi yimya balaka nung itemji bener aotsü meranger, ta ashi.

Lai kaket zülur aser lanurtem dang pei dak aliba sempet nung tamang akatsü ayongzüker.

Jubilee Memorial College nung Tourism & Hotel Management training tezükogo

Dimapur, Tsüklai/February 09 (TYO): Jubilee Memorial College, Mokochung nung Institute of Tourism and Hotel Management kübok mezüing batch atema Tourism and Hotel Management indang training February 8, 2024 nung tenzükua liasü.

Iba training course atema college nungi aser dangalen nungi nisung 30 tenüing züluoka lir. Iba training course ya angati lir aser Directorate of

Employment, Skill Development and Entrepreneurship, Government of Nagaland ajanga agizükua aser sponsor asü.

Iba sentong nung Arensunpla Aier, Trainer aser Debasish, ITHM Coordinator dena liasü. Sentong nung Dr. Imtiwati Jamir, Principal, Jubilee Memorial College ajanga pela agizükua o jembi aser labor market nung mapa shia alirtem nungdakba aser tapet training

agütsüba indang ashi.

Debasish, Coordinator, Institute of Tourism and Hotel Management ajanga Hospitality sector nung pai ajangshibatem, India aser bendanglen placement agütsüba mapa inyaksü asoshi nungdakbatem indang jembi liasü.

Iba course tenzükua sentong ya Supongsangla Walling, Assistant Professor, Department of Sociology lenisüba kübok agia liasü.

Miss Mega Model Hunt 2024 Season 3 alitsü

Dimapur, Tsüklai/February 09 (TYO): Nagaland Mega Entertainment ajanga Miss Mega Model Hunt 2024 indang Season 3 buba ayongzüksü lir.

Iba tetoktepba nung takok angurtem Nagaland tenüing nung Miss Queen Universe India nung 'direct entry' angutsü, koba Dubai nung August ita alitsü.

Taküm iba Miss Mega Model Hunt nung takok angur

nem maongka balala agütsütsü. Talisa iba tetoktepba mezüing jenjang tongteter nem senpet sen 70,000, tanabuba jenjang tongteter nem senpet sen 60,000 aser tasembuba jenjang tongteter nem senpet sen 50,000 agütsütsü aser iba den ano sempet balala alitsü.

Miss Mega Model Hunt open aser final audition ya March 16 nü Hotel Japfu nung anepdang 10:00 ako nungi

nikongdang 2:00 ako tashi alitsü.

Jangra aliba candidate temi iba tetoktepba nung shilem agitsü ayongzükur. Miss Mega Model Hunt nung shilem agitsüpur ya tar feet 5.5 tema asütsüla, arishi küm 17-26 tsüingta asütsüla. Audition fee sen 300 alitsü aser audition mapang White Tank Top, Jeans (blue/black) aser Heels (inch mashi) asemtsüla.

Mokokchung nung EVM & VVPATs Demonstration Centers amenokogo

Dimapur, Tsüklai/February 09 (TYO): Lok Sabha Election 2024 tonga arur asünung Mokokchung District kübok tongtipang tesem balala nung EVM & VVPATs Demonstration Centers amenoka lir, ta Deputy Commissioner Mokokchung, Thsuvise Phoji-i sangdong ka ajanga metetdaksü.

Temsüa aliba voters atema election maparen tajungtiba nung inyaktetsü mechi item centers ya amenok.

Mokokchung District kübok Demonstration Centers ya DC Office Mokokchung, Office

of SDO (C), Changtongya, ADC Office Mangkolemba aser ADC Office Tuli nung

amenoka lir.

Vote agütsüba yimya, electronic voting machines (EVM) amshiyim aser election dak sendakba inyakyim balala nung teyari agütsütsü aser lenmang sayutsü nükjidong nung item centers ya amenok aser office mapang EVM demonstration sayutsü, ta sangdong ajangasa ashi.

Zunheboto nung lokti tentet balala shisadokden senden amen



Dimapur, Tsüklai/February 09 (TYO): Satakha Town nung jila aser yimtsüing balala nungi education department indang stakeholders, GBs, kaketshirtem aser tesayurtem shisadokden senden ka February 9, 2024 nü Minister, Road and Bridges, G. Kaito Aye-i ayongzükua liasü.

Iba senden nung minister tenüing nung Officer on Special Duty (OSD) to minister, Hukato Murru-i district nung GPS, GMSs aser High school tem nung kaketshir ajema akumba tebilemtsü lemsatepa liasü.

Pai GBs tem dang pei yimtsüing nung aser pei aliba tesem nung kaketshir enrolment timba akumtsü

asoshi lenmang bushitsü aser asadangtsü ayongzükua liasü.

Mepaidoktetba sorkar maparen kar aliba mechi iba senden nung minister medentet, ta OSD ajanga osang agüja liasü.

Government school tem nung kaketshir ajema akumba asadangtsü aser timba kumdaksütsü lenmang bushia shisa lemsateptsü mechi iba senden ya ayongzük, ta SDEO Satakha, David Zhimo-i ashi.

Pai tesayurtem dang online teaching trainings policy nung temulung agüja adentsü aser teaching system tasen meteta amshitsü ayongzükua liasü.

Iba senden nung pangzüing asem renema liasü aser itemji, tesayurtem pei mapa nung

mapang ajak bendanga agütsütsüla aser danga mapa nung temulung magütsütsüla, ta lemtet.

Tesayurtem posting tesem nung anenzüksü asoshi yimtsüing aser putu menden ajanga tanenzükdak ki agütsütsü.

Yimtsüing balala nung aliba government school tem nung tanurtem tenüing züngokdaksütsü asoshi tsürabor aser tanurtem ajungshia comprehensive enrolment drive aotsü lemtet. Aser yangji lokti tentet balalai yaritsü aser SDEO office nem osang agütsütsü lemteta liasü.

Iba senden nung Co-ordinator EBRC, Atoli Zhimo menden liasü.

Tzübo tejen atema tekumdangtsü metetdaksür

Dimapur, Tsüklai/February 09 (TYO): Linük tesem ajungalen tila tanurtem tzübo mamshi aliba nung tsükba nungi kumzüksü/nokdangtsü asoshi Supreme Court of India ajanga totuyuba balala agüja lir, ta Mokochung district administration sangdong ka ajanga ashi.

Ali kiburi bore well/tube well yanglutsü mera kecha magidang anogo 15 jelia tezüluba nung ketdangsur nem metetdaksütsüla.

Tzübo atur, Govt./Semi Govt./Private ajak district administration nung registration

agitsüla.

Tzübo atuba mapang tzübo küketa barbed wire fencing mesüra iba ama atsü agi tzübo atsübanga ayutsüla.

Pump yanglushitsüsa kumra, tube well shibanga ayutsüla, ta ashi.

Tzübo tamajung ground level den medema lishi/lisem mesüra longsang agi kanga junga nembanga ayutsüla aser aibelener nem Criminal Code of Procedure, 1973 kübok District Magistrate ajanga totuyuba aser temerenshi agütsütsü, ta sangdong ajanga ashi.

Boiler Attendant tatidang atema metetdaksür

Dimapur, Tsüklai/February 09 (TYO): Office of the Labour Commissioner, Nagaland ajanga sangdong ka nung, Boiler Attendant Examination of II classes asoshi February 29, 2024 tashi atsülangtsür, ta ashi.

Iba tatidang ya Nagaland Boilers Rules, 1996 nung aliba ama agitsü aser tatidang agitsü anogo aser tesem indang osang khen lir agütsütsü. Taoba mapang sangdong nung shia aliba ama danga nungdakbatem kasa alitsü, ta sangdong ajanga ashi.

Chozuba Police Station SDPO jenjangi ajungketogo

Dimapur, Tsüklai/February 09 (TYO): Phek district kübok Chozuba nung aliba police station ya Sub-Divisional Police Officer (SDPO) jenjangi ajungketogo, ta Nagaland Deputy Chief Minister Y Patton-i Hokulbarnü sangdong. Patton, shiba Home Department indang minister in-charge lir, pai iba osang ya Chozuba Town nung Chakhesang Wrestling

Championship indang 29th Wrestling Championship aser Under 16 Meet mapang sangdonga liasü.

Local MLA Kudecho Khamo aser nüburtemi kanga ajungshiba sülen tang Officer-in-Charge kati repranga aliba Chozuba PS ya SDPO jenjangi ajungketogo, ta pai ashi.

Patton-isa SDPO office semzüksütsü asoshi pa Sub-division-i arutsü ta ashi.

AR-i ayongzükba National Integration

Tour nung shilem agirtemi Agra semdang

Dimapur, Tsüklai/February 09 (TYO): Assam Rifles temi ayongzükba National Integration Tour mapang Noklak nung aliba Khiamniungan kin nungi teintet rogo temi Agra nung aliba Army Airborne Training School nung Static and CFF (Combat

Freefall) jumps repranga liasü.

Iba mapang Paratroopers temi tebour tajung tenem-tenok

azüklen tasü ita iba inyakyim sayua liasü. Parnok ya AN-32 Aircraft kati anüinglen feet 12050 nungi tzükdaksü.

Teintet rogo temi iba mapang windspeed indang angazükua liasü, kong paratroopers 200 shi tayimtsü nungi pongzükua liasü.

Iba sentong ya ajanga paratroopers training yimyatem aser parnok tasü aitba tali jangja sayu.

NDPP-i Kakuto Shohe asükhu lemsatep

Dimapur, Tsüklai/February 09 (TYO): Guwahati nung February 9, 2024 nü CEB secretary Kakuto Shohe asüba osang angashia kanga sasar aser jashir, ta Nationalist Democratic Progressive Party (NDPP) tir Chingwang Konyak-i sangdong ka ajanga ashi.

Political activist ka ama asür Kakuto Shohe-i NPF nung inyakdang nungi nübür tenzükba nung pa takum bendanga agütsür aru.

Pa NDPP züingsem ka ama mapang tatsüka dang liaka pa nem nungloktsüba maparen ajak

bendanga agütsür tejangraba tulu nung inyaka aru, ta Chingwang Konyak-i ashi.

Pa asüba ya NDPP atema kisüing masü saka Naga nunger ajunga asoshi lenir tajung ka samaogo aser pa kanga menungratsü.

Kü den kinungtsü aser NDPP züingsem ajungai mangyimer kibong den asükhu lemsateper aser Tulusang Tsüngremi nenok mulung süngzüksütsü aser tashi agütsütsü sarasademtsür. Asür tanüla tesunep nung anisüingzükjangma, ta sangdong ajangasa ashi.



February 09, 2024 nü Nagpur nung Maharashtra state BJP Tir, Chandrashekhar Bawankule leniba nung party MLA tem aser party nung inyakertemi Congress lenir Rahul Gandhi anema longkak aيتدang tangokba noksa nung angur. Rahul Gandhi-i Ato kilonser Modi ya OBC (Other Backward Class) kibong ka nungi masü, ta jembiba anema parnokki longkak ait.

Parliament nung Jammu & Kashmir indang bill asem agizük

New Delhi, tsüklai/February 09 (Agencies): Jammu & Kashmir Union Territory atema Scheduled Tribes list nung Paddari aser Pahari na densema telok pezü züingoksemtsü atema Hokolbarnü Parliament nung bill ka agizükogo.

Parliament nung agizükba Constitution (Jammu and Kashmir) Scheduled Tribes Order (Amendment) Bill, 2024 ajanga Scheduled Tribes list nung Paddari, Pahari, Gadda Brahmin aser Koli teloktema züingoktsü.

Rajya Sabha nunga voice vote ajanga bill ana- Jammu and Kashmir Local Bodies Laws (Amendment) Bill, 2024 aser Constitution (Jammu and Kashmir) Scheduled Castes Order (Amendment) Bill, 2024 agizük. Lok Sabha nungbo bill ana ya tan hopta tetenzüklen agizüka liasü.

Jammu and Kashmir Local

Bodies Laws (Amendment) Bill-2024 ajanga Jammu & Kashmir nung Panchayats aser municipalities nung Other Backward Classes (OBC) nisungtem nem menden shiteta yutsüsü aser linük temzüing den medema Union Territory nung local body ozüingtem latettsü. Constitution (Scheduled Castes) Order (Amendment) Bill, 2024 ajanga Jammu & Kashmir nung Scheduled Castes list nung Valmiki nunger züingsemtsü. Valmiki nungertem telemsaji Chura, Balmiki, Bhangi aser Mehtar lir.

Rajya Sabha nung Jammu & Kashmir dak sendakba bill asemji benoka o lemtepbä sülen agizük.

Constitution (Jammu and Kashmir) Scheduled Tribes Order (Amendment) Bill, 2024 atema o lemtepbä mapang Minister of Tribal Affairs, Arjun Munda-i, iba bill ajanga mapang

talangka nungi ST jenjang akhangertem nem temeden agütsüsü, ta ashi.

Paisa, Arla 370 agienba ajanga item ozüing agizüktetogo, ta ashi.

Jammu and Kashmir Local Bodies laws (Amendment) Bill, 2024 atema o lemtepdang Minister of State for Home Affairs, Nityananda Rai-i, Union Territory nung OBCs nisungtem jenjang tajungba kümdaktsüsü atema sorkari telemtebä aika agia inyakgo, ta ashi.

Constitution (Scheduled Castes) Order (Amendment) Bill, 2024 atema o lemtepdang Minister for Social Justice & Empowerment, Virendra Kumar-i, item bill agizükba ajanga nisung aikati scheme balala ajanga tajangzük angutsü, ta ashi.

Muslim nunger lenir ka apuba sülen Bareilly nung tensa mejungi lir

Bareilly, February 09 assembly nung jembidang, (Agencies): Gyanvapi mosque mangatetep ken o dak sendakba nung Ittehad-e-Millat Council tongti, Tauqeer Raza Khan-i 'jail bharao' tayongzükba agütsüba ajanga police-i pa apuba sülen Hokolbarnü Uttar Pradesh nunger meyrjang aikati longkak ait, aser tang tensa kanga mejungi lir.

Shahmat Ganj area nungbo lung agi ontepogo aser police-i iba tatalokba bushisiingdangdar, ta District Magistrate-i metetdaksü.

Brihostibarnü Tauqeer Raza Khan-i longkak aita tepuokdak sünga iang (jail bharao andolan) ta tayongzükba agüja pa pusemertem dang police nem pudakjang, ta ayongzükba liasü.

Uttar Pradesh Chief Minister, Yogi Adityanath-i

Muslim nungertemi Varanasi nung Gyanvapi mosque aser Mathura nung Shahi Idgah mosque aliba tesemji parnok meyong ta jembiba ya anentsüla, ta jembiba atema Tauqeer Raza Khan-i chief minister anema longkak aittsüla, ta tayongzükba agütsü.

Hokolbarnü sarasadem tembangba sülen Raza Khan pusemertem meyrjang aika lenmang nung adenshir longkak ait. Tensa azüoktsü atema police 1,000 lemezükja lir.

Brihostibar nikongdang Haldwani nunga rara adoka liasü, aser iba tatalokba dak sendakba nung jembidang Raza Khan-i, "Sorkari rara aginüra onok renema dang lir. Onoki police mesüra injang metsübur. Supreme Court-i iba ya reprangshitsüla saka parnokki sorkar kübok inyaker," ta ashi.



Tamalen tangokba noksa nung ya taoba mapang Ato kilonser, P.V. Narasimha Rao angur. Rao nem linük nung tematiba civilian award Bharat Ratna agütsüsü.

FORM NO. 14 [See Regulation 33(2)]

OFFICE OF THE RECOVERY OFFICER- I/II DEBTS RECOVERY TRIBUNAL, GUWAHATI
Suwarna Bhawan, House No. 12, New Town Path, Near Hanuman Mandir, G.S. Road, Ulubari, Guwahati- 781007 (Assam)

DEMAND NOTICE
Recovery of Debts & Bankruptcy Act, 1993 kübok Sections 25 nungi 28 tashi aser Income Tax Act, 1961 nung Second Schedule kübok Rule 2 nung ajemdaker notice agütsür.

RC / 199 / 2023
CANARA BANK
-Versus-
SRI BIKASH MALLICK

To,
(CD 1) SRI BIKASH MALLICK
Sri Himangshu Mallick'er jabaso, MS Pranab Vidyapith HS School Canteen Indang Proprietor, Sri Himangshu Mallick'er Jabaso, Hindu Milan Mandir Road, Near Railway, Dimapur- 797112, Nagaland.

(CD 2) MRS. REKHA MALLICK
Sri Bikash Mallick kinungtsü, Hindu Milan Road, Near Railway, Dimapur- 797112, Nagaland.

DEBTS RECOVERY TRIBUNAL, GUWAHATI nung Presiding Officer-i **OA/ 316/2022** ajanga tuyuba Recovery Certificate nung **Rs. 30,55,258.36 (Rupees Thirty Lakhs Fifty Five Thousands Two Hundred Fifty Eight and Paise Thirty Six only)** den pendenteillite aser sentsüh mouma tashi future interest @ 14.50% Compound Interest Monthly w.e.f. **01-06-2022** nungi agütsü aser costs **Rs. 33,255/- (Rupees Thirty Three Thousands Two Hundred Fifty Five Only)** na (Jointly and Severally/ Fully/ Limited) anema lir ta metetdaksür.

(1) Recovery Certificate nung aliba sentsüh:	Rs. 30,55,258.36
(2) 01.06.2022 nungi 12.09.2023 tashi nung @ Rs.14.50% interest	Rs. 7,02,584.14
(3) Costs	Rs. 33,255.00
TOTAL	Rs. 37,91,097.50

2. Nü dang iba notice agütsüba anogo nungi anogo 15 tsüingda temalen shia aliba sentsüh agüjang ta tuyur, sentsühji magütsüetra Recovery of Debts Due to Banks and Financial Institutions Act, 1993 aser Rules kübok inyaktsü.

3. Taruba ken o angadangba anogo matongdang nü meyong kiojen affidavit ka nung sangdongang ta tuyur.

4. Nü dang tsüinglanglen sign süa alir matsüingdangi 16-04-2024 anogo nung anepdang 10:30 ako nung arutsü tuyur.

5. Temalen shia aliba senotsü dak alia nai item ya-a agütsüsüsa akümtsü:
(a) Iba certificate / execution proceedings notice agütsüba mapang nungi tenzuka interests.
(b) Iba notice aser warrant agütsüdang aser sentsüh angutsü atema inyakshangshidang indokba senotsü, charges aser teindokba ajak agütsüsü.

13-12-2023 anogo nung kü meyongnem aser Tribunal indang seal agütsür.

RECOVERY OFFICER
DEBTS RECOVERY TRIBUNAL GUWAHATI

FORM NO. 14 [See Regulation 33(2)]

OFFICE OF THE RECOVERY OFFICER- I/II DEBTS RECOVERY TRIBUNAL, GUWAHATI
Suwarna Bhawan, House No. 12, New Town Path, Near Hanuman Mandir, G.S. Road, Ulubari, Guwahati- 781007 (Assam)

DEMAND NOTICE
Recovery of Debts & Bankruptcy Act, 1993 kübok Sections 25 nungi 28 tashi aser Income Tax Act, 1961 nung Second Schedule kübok Rule 2 nung ajemdaker notice agütsür.

RC / 194 / 2021
CANARA BANK
-Versus-
MESSERS PODDAR GENERAL STORES

To,
(CD 1) MESSERS PODDAR GENERAL STORES
Poddar Gauri Shankar, asür Sitararam Poddar, Proprietor Firm Represented By Sri Gauri Shankar Poddar, Signal Bosti, Opp. Sub Urban Police Station, Signal Bosti, Dimapur- 797112, Nagaland.

(CD 2) GAURI SHANKAR PODDAR
Asür Sitararam Poddar'er jabaso, Signal Bosti, Opposite Sub Urban Police Station, Signal Bosti, Dimapur- 797112, Nagaland, Dimapur.

(CD 3) SRI DEEPAK ACHARJEE
Asür D M Acharjee'er jabaso, Kevija Colony Sect I, Near IOC, Dimapur- 797112, Nagaland, Dimapur.

DEBTS RECOVERY TRIBUNAL, GUWAHATI nung Presiding Officer-i **OA/ 315/2022** ajanga tuyuba Recovery Certificate nung **Rs. 35,12,158.41 (Rupees Thirty Five Lakhs Twelve Thousands One Hundred Fifty Eight and Paise Forty One Only)** den pendenteillite aser sentsüh mouma tashi future interest @ 14.50% Compound Interest Monthly w.e.f. **01-06-2022** nungi agütsü aser costs **Rs. 38,255/- (Rupees Thirty Eight Thousands Two Hundred Fifty Five Only)** na (Jointly and Severally/ Fully/ Limited) anema lir ta metetdaksür.

(1) Recovery Certificate nung aliba sentsüh:	Rs. 35,12,158.41
(2) 01.06.2022 nungi 18.09.2023 tashi @ Rs.14.50% interest	Rs. 6,61,344.24
(3) Costs	Rs. 38,255.00
TOTAL	Rs. 42,11,757.65

2. Nü dang iba notice agütsüba anogo nungi anogo 15 tsüingda temalen shia aliba sentsüh agüjang ta tuyur, sentsühji magütsüetra Recovery of Debts Due to Banks and Financial Institutions Act, 1993 aser Rules kübok inyaktsü.

3. Taruba ken o angadangba anogo matongdang nü meyong kiojen affidavit ka nung sangdongang ta tuyur.

4. Nü dang tsüinglanglen sign süa alir matsüingdangi 29-04-2024 anogo nung anepdang 10:30 ako nung arutsü tuyur.

5. Temalen shia aliba senotsü dak alia nai item ya-a agütsüsüsa akümtsü:
(a) Iba certificate / execution proceedings notice agütsüba mapang nungi tenzuka interests.
(b) Iba notice aser warrant agütsüdang aser sentsüh angutsü atema inyakshangshidang indokba senotsü, charges aser teindokba ajak agütsüsü.

18-12-2023 anogo nung kü meyongnem aser Tribunal indang seal agütsür.

RECOVERY OFFICER
DEBTS RECOVERY TRIBUNAL GUWAHATI

FORM NO. 14 [See Regulation 33(2)]

OFFICE OF THE RECOVERY OFFICER- I/II DEBTS RECOVERY TRIBUNAL, GUWAHATI
Suwarna Bhawan, House No. 12, New Town Path, Near Hanuman Mandir, G.S. Road, Ulubari, Guwahati- 781007 (Assam)

DEMAND NOTICE
Recovery of Debts & Bankruptcy Act, 1993 kübok Sections 25 nungi 28 tashi aser Income Tax Act, 1961 nung Second Schedule kübok Rule 2 nung ajemdaker notice agütsür.

RC / 186 / 2023
CANARA BANK
-Versus-
MESSERS SING AND SING

To,
(CD 1) MESSERS SING AND SING
Mrs. Asiang Wungleng indang Proprietorship firm, Super Market Shop No.SA62, Dimapur- 797112

(CD 2) MRS. ASING WUNGLENG
Mr. Alone Pongener kinungtsü, House No. 13, Bank Colony, Dimapur, Nagaland-797112.

(CD 3) MS. PISKIM KASOM
Mr. W. Makang kinungtsü, C/o City Clothing, Super Market, Dimapur, Nagaland- 797112

(CD 4) MR. I PURTOBA PONGENER
Asür Imlisangba Pongener'er jabaso, House No. 13, Bank Colony, Dimapur, Nagaland- 797112.

DEBTS RECOVERY TRIBUNAL, GUWAHATI nung Presiding Officer-i **OA/ 278/2022** ajanga tuyuba Recovery Certificate nung **Rs. 65,40,572.91 (Rupees Sixty Five Lakhs Forty Thousands Five Hundred Seventy Two and Paise Ninety One only)** den pendenteillite aser sentsüh mouma tashi future interest @ 14.50% Compound Interest Monthly w.e.f. **01.05.2022** nungi agütsü aser costs **Rs. 68,255/- (Rupees Sixty Eight Thousands Two Hundred Fifty Five Only)** na (Jointly and Severally/ Fully/ Limited) anema lir ta metetdaksür.

(1) Amount due as per the Recovery Certificate:	Rs. 65,40,572.91
(2) Interest from 01.05.2022 to 06.09.2023 @ Rs.14.25%	Rs. 12,58,881.09
(3) Costs	Rs. 68,255.00
TOTAL	Rs. 78,67,709.00

2. Nü dang iba notice agütsüba anogo nungi anogo 15 tsüingda temalen shia aliba sentsüh agüjang ta tuyur, sentsühji magütsüetra Recovery of Debts Due to Banks and Financial Institutions Act, 1993 aser Rules kübok inyaktsü.

3. Taruba ken o angadangba anogo matongdang nü meyong kiojen affidavit ka nung sangdongang ta tuyur.

4. Nü dang tsüinglanglen sign süa alir matsüingdangi 17-04-2024 anogo nung anepdang 10:30 ako nung arutsü tuyur.

5. Temalen shia aliba senotsü dak alia nai item ya-a agütsüsüsa akümtsü:
(a) Iba certificate / execution proceedings notice agütsüba mapang nungi tenzuka interest.
(b) Iba notice aser warrant agütsüdang aser sentsüh angutsü atema inyakshangshidang indokba senotsü, charges aser teindokba ajak agütsüsü.

06-12-2023 anogo nung kü meyongnem aser Tribunal indang seal agütsür.

RECOVERY OFFICER
DEBTS RECOVERY TRIBUNAL GUWAHATI



TIR YIMYIM YIMOBILEM (EDITORIAL)

DIMAPUR

KÜPTOKNÜ

TSÜKLAI 10, 2024

Kechi Process asütsü ?

Tanü yangi chiyongtsü yanglua renemer ayoktsüba indang lemsatepnüba agi English ojang ka "Process' ta amashir. Ashi, "Kechi yanglutsüba ?" ta amshinütsüka saka jet ta melamelaa angatetsü a tema English ojang ya amshiogo, kechiyong chiyongtsü yanglubaji tanga masü saka 'Food Processing' indang lemsatepner. Asenoka tangar state-tem nung ama "Food Processing Industry" lapoka inyaktsü kanga ajungshiteper aser iba mapa tenzüksü asoshibo government nungi asüyonga mesüli bank nungi asüyonga senotsü agütsütsü aser aputsütsü renema dang lir. Ashiko, asenoka tesem kar nungbo " Food Processing Industry' a tema kiojenbo yanglua alitsüa akok. Ajisüaka, kiojen yangluba mapa metenzükdang, tamasa asenoksasa asenok dang asüngdangtsüba tongtibang o kaji, kechi process asütsü bilema Food Processing Industry lapoktsü ? Asenok angazüksü aser angatetsüba kaji, tawa Meghalaya nung bolong agi chiyongtsü tapu balala yanglur bendang limatemi yoktsü asoshi 'Jackfruit Processing Unit' ka South Garo Hill district nung lapokogo. Atangji, iba industry-ji government-i lapokba masü saka government-i yaria Cooperative Society kati lapokba lir. Iba industry nung agitsü a tema anogo shia aluyimertem nungi sen lakh ana shi jenjang bolong alitsü aser iba jagi jackfruit chips, jackfruit flour aser jackfruit jam yanglur Europe aser Russia leni yoktsü. Iba mapa nungji nisung 150 inyaktsü aser aluyimer 5000 shi ajangzüksü. Meghalaya nung iba Jackfruit Processing unit den ano tanga aonsutsü aser süngjanglijang agi chiyongtsü tapu balala renema yanglur tangaleni yoker. Item ajakji asen lima nungang tajungba inyaktsüba mapatem lir. Atangji, asen lima nunga tera dang süaka chiyongtsü yangluba mapatem karbo inyaker saka Assam aser Meghalaya nung amaji state government-i nungita inyakba agi takok ngua inyakba mapa aika mangur. Dimapur nunga Food Processing Industry lapoktsü asoshi Industrial Growth Center, Ganeshnagar yanglua lir saka kiojen yanglua toktsü dang ashiko, yangji kecha meyanglur. Iba tesemji arem kümer aliba Covid mapang to khen chitoker Quarantine center lapoka amshiogo. Asenok jakla, yimya aser mapaji iba jagi sayur. Asenoki government teyari agia kiojen yanglutsüba kanga janjar, kechiyong kiojen yangluba nungji sen aluzüka agitettsü saka kiojen yangluba nükjidong ataloktsü asoshibo tebilema mebilemer. Aji oda, asenoki shi kanga achir asünungji, Meat Processing Industry lapoktsü janratsüa akok, saka asenoki shiruru memetsüra iba industry kidangji kechi shi agi chiyongtsü yanglutsü ? Kasaji, asenoki Fruit Canning industry lapoktsüa akok, saka aji lapoka yur kong, koba lu nung atangba kechi süngjang menünga kechi chiyongtsü yanglutsü (?) ta asüba tasüngdangbatem langzütsübjang tongtibangba lir. Atangji, asenoki alu yimtettsü aser chiyongtsüa tapu aika yanglua yoktettsü, anungji asenok sentong dang ajangtsüla. Aji oda, asenoki Food Processing Industry lapoktsü bilemra, kiojen yanglu metenzükdang tamasa alu ayimtsüba sentong tama yanglutsüla aser aluyimba mapaji takok ngua inyak nung dang industry nungji chiyongtsü yangluba mapatemji tenzüktetsü ta asenok dak tangatetba alitsüla. Joko, sen agizüka agitsü kisüng bilema alu ayimtsü aser industry lapoktsü asoshi kiojen yangluba mapatem to asenoksasa asenok ashioptsüba mapa ka lir ta asenoki angatetdi. Kasaji, government-i industry lapoka nübertem nem mapa agütsüba putu to süiogo , joko tangbo government teyari agia kijai süshia mesüra ayongteper cooperative society ama teloktemi süshia Industry tapu balala lapoka 'Processing' mapatem inyakba putu lir. Aji oda, Food Processing industry tenzüksü a tema nungdak tulutibaji aluyimertem lir aser aluyimertem asoshia nungdak tongtibangtibaji parnokki züsentetba alir industry-temji asütsü.

OLEMSABANG

Tsa ! Mokokchung Town ya mi agi yamai maochir no!

L. Imli Imsong Ungma

Asenok ajaki metet Mokokchung town tiyongtsu (Police Point) anasa ya mi agi kangasa maochi-i rongdakba aibensa atalokogo. Kum aika teyaklen külen ken rongdakle, ano küm eshika lir arudang asenok tekulem ki (Tenla ki) ajak rongrepa rongdak. Ano külenbo tang tashi temelen yanglua mali aser aji agi town tiyong kanga tepur mejongi kümer lir. Kokra taka taiter kari alizuker tasen kar yanglutsü leman ali ajang nunga koda? Aji oda ajaklen mapang shia rongpet rong arur, tatemsa Indian Army-temi taochi mekai rongdoktsu. Iba mapangjibo nisung-a süng rongsetdaksü, iba anogo dangji Aiatai (27th December) anogo ta ajar. Jogo police point anasa mi agi merongdokbaji ki ishika dang lir.

Asenok Aor yimsüsür aika liaka Wabong Jongshilemba, MLA, kum ishika dang inyakaka pai nüpurtem anisüngzüksü aser tajangzük angutsü ki tuluka yanglua doktsü (yamala tanga town nungbo maka). Aser iba ki nungji nüpertem pii sasai shishilembar (self employment). Ya atamata mapa ka masü inyaka doktsü. Pa tsungnepji (foot print) kodanga mesmai alitsu. Anungji koba osetsa aoyi küma rongdokogo Government-i yaka temenok agutsür ano ajangshia tanaben shishilembaji südaktsünür.

Tamalen nungi ataloka rongdokbaji, oset kibur aser ki kibur dang takoksa masu, saka item ajakji nüpur dena takoksa lir. Takoksa ajururtem asoshi kanga sasatsür aser meimer. Ano tanaben asüngsashir shishilembaba nung temulong majemi(discourage) oangni ta ajangshir. Aser Government dang temenokki agüjangma ta mepeshiangma. Saka asen indang osetyari kwi jengjang liasü ochi shia shiangma (Kechiyong aji asen tamanger ka teinyaktsu aser temoatsü lir).

Anungji temeim iba osang azüngertem asenokia ken arok aroka shisadangtsü ka lir ta nibo shisadanger. Kechiyong neja oset aika denji arok tongtibang kisen-a ana (2) tashi densenma lir (Tenla ki aser MMC ki). Yamala asentsu sena yangluba ki tem aser nüpurtem asoshi yangertetba osettem aoyi küma oadokbaji asenok nüpur ajaki aroka shisadangtsü kanga nungdak ta nibo iba osang kakat ajanga ayongzüker.

Khristan Taküm nung Pandemic Angatetyim kar

Mr. M. Imkong Imchen

(Yashi adok nungi...)

- * Alima nung kechisa ataloker ajakji Tsüngremi meteta ataloker, anungji Pai ajak azüoktsü akok ta Tsüngrem dak tamang ayur asü mayur, ta Tsüngremi tendanger.
- * Pandemic mapang Tanela Temeshi lenisüba nung Tsüngrem anasai arur asü marur ta Tsüngremi asenok tendanger. Pandemic mapang Tanela Temeshi agi ne taküm rangben süngdakjangma.
- * Pandemic ajanga alima rangben sensak kümdaktsüogo. Meimchir jenti tachi tajemtsü maka, talisa sensaker, lajar, meshimetsürtem jenokdak maka anogoshia yasetta alima nungi piladaki, parnok asoshi kechi inyaktsütsü ta Tsüngremi asenok tendanger.

O Tempang:

Pandemic ajanga asen tashi mait jenti tuteta sayuogo. Asenok taküm nung tazüokba mali, anogoshia Tsüngrem anema temenen beshiba, ajak jungkai adokogo. Ano iba pandemic mapang ya Tsüngremi asenok tendangba mapang ka lir. Anungji asen teyanglur Tsüngrem pelatsüsa Pa sentong angateta pandemic mapang asen teinyaktsü kechi lir itemji meranga inyakadokdi. Iba pandemic mapang ya temoatsü mapang ka kümdakja kija kibong ajak yanglushia asen teyanglur Tsüngrem anasai odi ta ayongzüker.

(Iba ocet ya Ao Baptist Arogo Padum Pukhuri-i adokba Ranglok Kakat July 2021 Adok nungi agitetta adokshir)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger agateta agitsü mepishir

Bibby Stockholm nung alir nisung 40 baptiba anema bushisüngdang



Portland, Dorset nung aliba Bibby Stockholm noksa nung angur.

February 09, 2024: Bibby Stockholm nung jenoka alir tebur 40 tzu nung baptia Khristan yimsü agizükba sülen Home Office-i iba tatalokba bushisüngdang tenzükogo.

Portland, Dorset nung aliba Bibby Stockholm rong nung jenoka aliba Muslim nungertemi Weymouth Baptist Church den Khristan yimsü indang metetpelar.

Bodhbarnü (February 7) Parliament nung Sussex MP, Tim Loughton-i, "Archbishop of Canterbury-i, pai office mapa agizükba mapang nungi Church of England nung züngsem shilem 15 ajema kümogo aser coronavirus wara matongdang küm ter tsüngda Church of England nung küm shia nisung 140,000 shi baptia liasü saka tangbo kanga ajema küm shia nisung 87,000 shi dang baptir, ta shiogo," ta metetdaksü.

"Bibby Stockholm nung alirtem nisung tenet shia nungi nisung kabo ajungbena Khristan kümogo, ta onok nem metetdaksüogo," ta pai ashi.

"Church of England-i mimshia lenirtem dang, Damascus nungi Khristan yimsü agizükertemi tejenokdak mepishia aliba pusemang ta tuyuogo. Arogoji shirnok kübok aser Archbishop-i saru agütsürtem ashioksür asü? ta ni Ato kilonser dang asüngdang," ta paisa metetdaksü.

Ato kilonser Rishi Sunak-i pa dang, home secretary James Cleverly-i tebur aika baptia Khristan yimsü dangi meyipba tatalokba osang tejangja asüngdangogo, ta ashi.

Tanga yimsü ka agizüksü atema Islam yimsü toktsübaji Islam yimsü amangertem atema ozüing alema inyakba mapa ka lir.

Weymouth Baptist Church-i parnok indang website nung sangdong ka ajanga, "2023 küm October ita nungi tenzuka onoki Bibby Stockholm barge nung tejenokdak bushir refugee tem agizüker. Onoki tanga Arogotem den longjemer Bibby Stockholm nung alirtem atema ministry mapa balala inyaker. Tang parnok 40 shii mapang

shia Arogo ka mesüra ka nung adener aser Amongnü tekülem sentongtem nung parnok 25 nungi 30 tashi arua adener," ta metetdaksü.

"Parnok indang mobile phone nung translation apps ajanga parnoki shilem agiteter. Teburtem jagisa hopta shia Farsi oshi ajanga ashiba inter-church Bible study nung adener. Iba oshi jembiteter aser parnok sobaliba meteta alir British nunger ka leniba nung bible study agir," ta Arogoisa metetdaksü.

"Iba dak alia nikongdang süngo jema sensaksemba sentong agir. Khrista osangtajung ajanga ainertem dang aria bilema meimtsü, ochi temeden aser ainertem pelaa agitsü atema sayur," ta Arogoi metetdaksü.

Osang angazükba agi, yaküm October ita nung parnok aruba sülen nisung tenet baptia liasü aser baptiba sentongji linük tesem balala nung agi.

Tzu nung baptisüpurtemi hopta 10 bosa evangelical course ka agitsüla.

US nung Khristantem aikati Arogo tasen bushir

February 09, 2024: US nung Khristantem aikati pei Arogo yutsür chichiba Arogotem bushia oa adener, ta Lifeway Research survey ajanga bushitetogo.

Arogo tasen bushia oa adener shilem 60 bo pei aliba tesem melenshiba agi lir aser Arogo tasen bushir tanüngba shilem 40 jagi kuli balala ajanga liasü.

Interview ka nung jembidang Heather Edwards-i, "Tenla kitem tanaben lapokba sülen künati (la kinüngbu) tanaben Tenla kidangi ao ajisüaka 'iba dang nungi tali nüngdaker' ta ni apiteta liasü," ta ashi.

Heather Edwards aser la kinüngbu, Norm na northern Virginia nung alir.

Coronavirus

wara

tembangba sülen Edward aser la kinüngbu nati Arogo tilaka dang süaka sayutsüingi o tarok lemsatepba Arogo ka nung adentsü tejangraba liasü.

Lifeway Research nung executive director, Scott McConnell-i, "Pei Arogo toktsür Arogo tasen bushiba kulitem onoki asadangba mapang nung onoki taitsüba kuli aika metet. Arogo kari nisungtem o bendanger, Arogo kar anemsü aser Arogo kar nungbo züngsemtemi par pastor ji sayutsüingir tajung ka masü ta ashi," ta metetdaksü.

McConnell-i, iba survey osang ajanga Arogotem tajungba küma melenshitsü atema Arogotemi maongka angur, ta metetdaksü.

Northern Virginia nung aliba

Crossroads Presbyterian Arogo nung pastor, Alex Young-i, Arogo aika nung Laishiba tesayuba magütsüba agi nisung aiakti Arogo toktsür, nisung karbo amanga-amanga joko Tsüngrem dak mamangtetba agi Arogo toktsür aser karbo pei Arogo nung mangatettep adokba agi Arogo toktsür tanga Arogo bushir, ta metetdaksü.

Osangbener den jembidang pastor Young-i, "Khristantem aika dak kasa tangatetbaji lir, ajisüaka tanabuba kuliji-mangatettep adokba ajanga lir," ta ashi.

Baptiba, Arogo ketdangsüba aser Laishiba ratetba tsütsülen mangatettep adokba densema kuli balala nung mangatettep adokba ajanga aikati Arogo toktsür, ta paisa shisem.

ANOGO ABEN TSÜNGREM DEN

Nai kong repranger?

Peteri tejak meyipa, nütsüing shiba Yisui meim aser ano shibai aonung chiyongdang Yisu teku nung metaloker... Kibuba, aser iba nisungi kechi asütsü? Yohan 21:20-21.

Tsüngremi ne den jembir külen mezüingbuba nai inyaksüba lendong lir. Yisui Peter dang pai kechi mapa inyak aser koba tasü agi pa asütsü iba indang ashi (t.18-19). Peter taküm nung ibai temeshi mapang ka liasü. Pa kiburi pa dang tarutsü taküm indang ashi. Pa takümü jangratemtsü taküm ka masütsü saka pa Kibur aser Masteri shimtetba aser moatsüba taküm.

Yisui pa dang ashiba langzüksü melena pai pa meketa alirtem reprang. Pai Yohan ngushi, shiba dang Yisui meim. "Saka Kibuba, iba nisung koda?" Peteri asüngdang. Peter dang pa kechi tasüba agi asütsü iba indang Yisui pa dang shir liasü. Pa mapa tangar den medemdangtsüji koda yimya liasü! Tsüngrem tenzükertem asoshi ibai tatitangba tulu liasü. Tsüngremi kü tembar nem ki tuluba agütsü asü? Tsüngremi kü tembar temeimba anebtsü saka nibo manebtsü? Tsüngremi tembar dang junger nung dang yutsür asü? Tsüngremi tembartembo kibong anasa alitsü mela saka nibo talangka yok ?

Yisui Peter aser Yohan lenmang balala nung jajatsü mela. Yisui Pa tenzükuri pei tenük pa master dak masü tangar dak ranglokbaji koda lendong aji metetta liasü. Nai kong rangloker? Nai Tsüngremi ne den sendaktepa aliba nungi tangar dang inyakba tali bilemer asü?

Assam nung Khristan school tem dang Khristan temaitsü agientsü tuyu

February 09, 2024: Assam nung Hindu telok kati state nung Arogoi ketdangsüba Khristan school tem nung Khristan temaitsütem ajak agientsü atema anogo züngzüksüogo.

Hindu telok- Kutumba Surakshya Parishad (family safety council) nung Tir, Satya Ranjan Borah-i, Khristan missionary temi Khristan yimsü dangi meyipdaksütsü atema school amshiba ya nokdangtsü atema onoki iba tetuyuba agütsü, ta metetdaksü.

February 7 nü Guwahati nung osangbenertem senden ka nung jembidang Borah-i, "Khristan missionary temi schools aser shisaliok rejutem ya yimsü rejutem kümdaksür," ta ashi.

Hindu telok jagi school tem nung Yisu aser Mari noksatem agientsü atema anogo 15 züngzüksüogo; tashi mangara telemtetba kar agia item school tem anema inyaksü, ta Khristan school tem amokmeren.

Borah-isa, onoki Khristan school tem nung inyaker putirtem, nun tem aser brother tem nem 'cassocks' süoshi mesemdaksüner aser school campus nung Khristan yimsü dak sendakba yimya balala mebenshidaksüner, ta metetdaksü.

Paisa, Khristan school tem nung Khristan yimsü temaitsütem ayuba ajanga Khristan yimsü ajungkettsür, ta metetdaksü.

Ajisüaka Guwahati nung Archbishop, John Moolachira-ibo, Khristan school tem nem tai tonglokja alibaji ajak tiyazü aser tamendakdak maka, ta shiogo.

February 9 nü osangbener den jembidang pai, "Onok amokmerenba osangji ni angashiogo; parnoki kechiba ya inyakerar ni mangateter," ta ashi.

Khristantemi tesüiba küm aika Assam nung kanga tezülen aliba tesemtem nung sensaker tribal tanurtem nem shisaliok agüja arur.

"Iba ama yimjak nung amokmerenba ya kanga majung. Iba amokmeren anema onoki legal tsütsülen nungi teyari bushitsü," ta putirisa metetdaksü.

Khristan lenirtemi parnoki Assam Chief Minister, Himanta Biswa Sarma ajurua iba tebilemstü lemsatepsü, ta shiogo.

Nütsüing million 31 aliba Assam nung nütsüing shilem 3.74 bo Khristantem lir aser ibaji national average dang nungi teimba, kechiyong linük nung nütsüing shilem 2.3 dang Khristantem lir.

**AO OSHI ANGAZÜKDAK:
TANÜ ANGAZÜKTSÜBA OJANG**



Tir Yimyim

Shitishir

(n) azüing aser zülu meteter (literate person)
* Naga nungerbo ajak amato shitishir kümogo.

Shito

(n) jarong nung shi atoba (Meat in bamboo skewer)
* Benjong agütsüri kibong shia nem shito agütsü.

OLONG PAITEP # 6693

15x15 crossword grid with numbers 1-18 indicating starting positions for words.

TIPIEN

- 1. Mali (4)
- 5. Tebilemba züluba (4)
- 6. Ochishir masü (7)
- 10. Maneni (3)
- 11. Shisadang (9)
- 12. Aso (3)
- 15. Chi kenshiba oset (7)
- 17. Saklok (4)
- 18. Ya kanga tako (4)

LANGTSÜNGLEN

- 1. Aon nangdaksüba (5)
- 2. Alima toktsür ao (3)
- 3. Tekolok meshitak (4)
- 4. Tekolak o temang na tetsüngda (6)
- 7. Kidang alir (5)
- 8. Jang asepbba oset (3)
- 9. Nü dang tambu (3)
- 10. Talangka mepila (5)
- 11. Aoksa (6)
- 13. Sü atakba lisü (5)
- 14. Tsüngremi sayu (4)
- 16. Teka agi amet (3)

OLONG PAITEP # 6692 TELANGZÜBA

TIPIEN :

- 1. Taa, 3. Teküm, 6. Aibelen, 7. Aut,
- 9. Ajizük, 10. Ojala, 11. Semer, 13. Sen, 15. Kioktsü, 17. Itsük, 18. Kar.

LANGTSÜNGLEN :

- 1. Tai, 2. Asensor, 3. Tanü, 4. Kua,
- 5. Mitsüktsü, 6. Azübenshi, 8. Lah,
- 9. Jangkok, 12. Akok, 14. Nashi,
- 16. Sür.

NAI-A YA METETTER MA



'Otter' ta ajaba shiruru ya tongtibangsa tapu pezü kuma lemdanger lir. I temji yamai: European Otter, North American river Otter, Sea Otter aser Giant otter. I ba shiruru indang kanga dang tesüngmangtsü kaji, Otter yabo mejang dang teka amteper mejanger. Yamala noksaji ka yangi angur. Koda jangratemtsü!

HNLC lenirtemi Meghalaya deputy CM den ajuruteptsü



Shillong, Tsüklai/February 9 (Agencies): Tenokdangba agütsür aliba telungpur telok Hynniewtre National Liberation Council (HNLC) lenirtemi Meghalaya deputy chief minister Prestone Tynsong den ajuruteptsü mulung agizükogo.

HNLC puri tawa Centre aser Meghalaya sorkar den sensaksema aliba nungi atsüingonogo aser parnoki ashiba agi, Meghalaya deputy CM Prestone Tynsong den ajuruteptsü asoshi parnok mulunga lir, ajisüaka parnoki shimba tesem aser mapang nung ajuruteptsü.

HNLC general secretary aser publicity secretary Saiñkumar Nongtraw-i ashiba

agi, Meghalaya deputy chief minister-i parnok den ajuruteptsü atema benokba parnoki agizükogo.

Ajisüaka senden ya parnoki latetba mapang aser tesem nung dang agitsü.

Nongtraw-i, "HNLC lenirtem den mashi tesem ka nung ajuruteptsü atema deputy CM Prestone-i osang yokba onoki agizükba osang agütsüogo," ta ashi.

"Onok ajuruteptsüba tesem ya HNLC shimtsü; tanga linük ka nung süaka idakji agitsü. Pa tekümzükba kübok toktsütsü; onoki pa nem chiyongtsü tajung aser tanendak tajung agütsütsü," ta pai ashi.

HNLC lenir yagisa, "ibayongji pa tsüba malitsüla

mesüra senden nung shilem agitsü atema tanaben bilemshitsü nungdak mali," ta ashi.

Temetetsü kaji tenokdangba agütsür aliba HNLC telok yagi taoba küm December ita 20 nü Centre aser state sorkar na den sensaksema aliba nungi atsüingina liasü.

HNLC-i ashiba agi, parnoki takhangba mataloktsüba ajanga iba tia maka telemtetba ya agitsüsa aküm.

Ajisüaka Meghalaya deputy CM Prestone Tynsong-i HNLC dang parnoki Centre aser state na den sensaksema aliba nungi atsüingintsü atema telemtetba agiba ya tanaben bilemdangshitsü asoshi mepeshia asüngdangogo.

NE nung senotsü junga mamshiba atema NEC tebilemstsü akar

Shillong, Tsüklai/February 9 (Agencies): North Eastern Council (NEC)-i Northeast state tem nem senotsü lemozüksüba junga mamshitetba atema tebilemstsü akaba lemsatepogo.

Ken o indang jembiba mapang NEC secretary K Moses Chalai-i ashiba agi, Northeast nung senotsü agiba ama mapa kanga temulung süabo minyaker.

"Parnok karakara mora onoka kara moteter, anungji iba ya tesem kar nungbo sendaktepa lir, ajisüaka ni ashitsü agi kanga merangdangogo aser terenlok karbo lir," ta Chalai-i ashi.

NEC secretary K Moses Chalai-i Bresthostibar nikongtsütsü osangbenertem den sensaksema mapang iba olen lemsatepa liasü.

Ajisüaka NEC secretary-i tarutsü nung tensa tajungba küma aotsü imlaba lemsatepa liasü.

Pai ashiba agi, "DoNER-i crore 3000 majung mesüra iba dang timba agüja aruogo, saka takümogo Prime Minister's Development Initiative for North East Region (PM-DevINE) scheme benokba sülen crore 6000 jungogo. India sorkari asenoki tajungba inyaktetsü ta angateta arudar."

Ajisüaka NEC secretary K

Moses Chalai-i, koba Northeast state nung senotsü junga mamshir iba indang mejembi.

"Ni tenüing teta mejembitsüla, saka state ajakbo kasa masü. Terenlok lir aser senotsü ya state treasury mesüra state finance department ajanga masü saka vendor dangi indang indanga aoer," ta Chalai-i ashi.

Paisa, "tang mapa koda kara inyakteter aji ken o dak sendaka aliba department aser vendor tem dak keta lir. Ajakbo kasa masü ta shinür. State tenüing tetshia jembitsüji tim masü. Parnok karibo tajungba inyaktetsü," ta ashi.

Arunachal nung district tasen ana tentettsü agizükogo

Itanagar, Tsüklai/February 9 (Agencies): Arunachal Pradesh nung district tasen ana tentettsü atema state assembly nung bill tasen ka agizükogo.

Arunachal Pradesh nung district tasen ana ya state anüolen aser anüoletiplen tentettsü telemtetba agiogo.

Arunachal Pradesh chief minister Pema Khandu-i, Arunachal Pradesh (Re-Organisation of Districts) Amendment Bill, 2024 benok aser iba ajanga Keyi Panor aser

Bichom district tentettsü asoshi lenmang lapoktsüogo.

District tasen ana tentetba sülen Arunachal Pradesh nung district ajak senteper 28 akümtsü.

Keyi Panyor district kübok yimtsüing 195 aser nütsünyongsük 30,000 dak tema lir aser iba district ya Lower Subansiri district nungi jakzüka aotsü.

Iba district indang headquarters ji Yachuli (Ter Gapin-Sam Sath area) nung

asütsü. Kasa mapang nung Bichom district ya East Kameng aser West Kameng district nungi agitettsü atema renema lir.

Bichom district atema headquarters ya Napangphung asütsü shimogo.

Bichom district indang tasazük square-kilometers 2897 aser nütsünyongsük 9710 asütsü, kong West Kameng nungi yimtsüing 20 aser East Kameng district nungi yimtsüing 11 densema lir.



Karachi, Pakistan nung political party balala indang campaign poster tem agiba noksa nung angur. Hokolbarnü vote azüngba mapang tepuokdak yua aliba taoba Pakistan PM Imran Khan-i teyari agütsüba independent candidate tem tejakdang liasü.

Israel-Gaza: Sentong tapet meyanglui Rafah amakba pu masemtsü ta US-i shiogo

Washington, Tsüklai/February 9 (Agencies): US-i Israel dang Gaza nung anüolen tiplen aliba Rafah yimti sentong junga meyanglui makra timtem lendong tulu adoktsü ta tekümdangtsü metetdaksüogo.

Egypt den arrtsü nung aliba yimti nung ya Palestine nung million 1.5 shi jenjang kanga mejungi jenoka lir.

White House-isa, iba tesem nung jenoka aliba refugee tem kümzüka toktsütsü atema jenjang shitak magi tongtibang operation benoka inyakba parnok pu masemtsü ta shiogo.

Israel leniri Rafah amaktsü asoshi military dang renemang ta shiogo, ta ashiba sülen US-i iba olen lemsatepa liasü.

Rafah nung alirtem ya timba Gaza kübok tesem balala nung rara adokba ajanga jena arurtem lir aser parnok süki nung lidar.

Israel-i Brehostibar anepdang Rafah nung tesem kar nung bomb pokloktsüogo aser osang ajanga ashiba agi Israel nung indang tank temi injang khalokja liasü.

October 7 nü rara tenzüka sülen Northern aser central Gaza nung tesem timbaka Israel nung sepaitemi ajasatsüogo.

Brehostibarnü nikongtsütsü Rafah metetshi-i jembiba mapang US Tir Joe Biden-i, Gaza nung Israel nungeri jenjang agiba ya kanga alia agidar, ta ashi.

US National Security Council otongdar John Kirby-i

ashiba agi, Israel nung sepaitemi iba tesem mesüra tesem kechi nung südir süaka meita aoba sentong balala benoka inyakba mapang tai maketba nüburtem kümzüka toktsütsüji parnok khuret lir.

"Item nüburtem atema tang military benoka inyaksangshira timtem tekangshi tulu asütsü aser ibajibo onoki pu masemtsü," ta pai ashiba den, Israel-i Rafah nung tongtibang operation ka benoka inyaksangshitsü jenjang agibabo US-i tang tashi nungbo lazüka mali, ta shisem.

Deputy State Department otongdar Vedant Patel-ia, Kirby-i jembiba olen den mesüktepa ashiba agi, "onoki (US) sentong tatongi tejangja ka meyanglui iba amala jenjang agiba pu masemtsü."

Rafah nung operation benoka inyakra iba tesem nung alirtem koleni aotsü ta BBC-i asüngdangba mapang Patel-i ashiba agi, item ya kanga dang tongtibang tasüngdangbatem lir aser Israel-i telangzüba agütsütsüla.

Israeli kübok Tel Aviv yimti nung jembiba mapang Secretary of State Antony Blinken-i ashiba agi, Israel-i kechi military operation sa benoka inyakdir iba mapang civilian tem ya ajak dang temaba jenjang nung toktsütsüla aser Rafah dak sendakba nung iba ya kanga ochi lir.

US shirnok Israel military

nem teyari agütsürtem rongnung tongtiba lir, parnok gaza nung Israel-i jenjang balala agiyonga aoba indang aibenbo mejembir, saka iba ya tekümdangtsü metetdaksüba ka lir.

Washington-i, Israel nem kümshia USD billion 3.8 alang military teyari bener yoker aser Israel ya iba amala teyari agizükertem rongnung temaba jenjang nung lir.

October 7 nü Hama puri Israel anüoletip amakba sülen nisung 1,300 shi tepseta liasü ta Israel nung ketdangsürtemi ashi.

Iba sülen Israel-i Gaza amakba mapang Palestine nung 27,800 dak tema tepsetogo aser nisung 67,000 yiruogo, ta Hamas indang health ministry-i metetdaksü.

"Parnoki khen atema amenoker aliba tejenokdak lidar, kong tzü, electricity aser chiyongtsü tapet mali," ta UN chief António Guterres-i Brehostibarnü ashi.

"Hamas puri jenjang agiba onoki jangja jangja aija arudar aser Gaza nung international humanitarian law anema inyaksangshiba-a onoki jangja jangja aija arudar.

Brehostibarnü Israel Ato Kilonser Benjamin Netanyahu-i ashiba agi, pai Rafah nung military operation atema renemtsü asoshi tetuyuba agütsüogo aser ita ishika dang lir Israel-i Hamas madak takok angutsü.

Pelaba Lemsateper

Onoki kanga meima alila Ojala/Otsüla asür **Alemliila** (Longsa), 25th January, 2024 anogo nung ajungbena ka dang iba lima nungi piladang kija kibong aser lokti balala shirnokisa nübo, ronsen aser sarasadem agi onok nungita yariogo, nenok ajak dang onoki kanga pelaba metetdaksür.

Tsüngrem Tulusangi nenok ajak talubosa moajangma ta sarasademtsür.

Temeim Chirnur, Semchirsemmur aser Kinungertem.



ASO: 1938 - ASÜ: 25.01.2024

Philippines anentsüh lendong nung asür 15 jungogo

Manila, Tsüklai/February 9 (Agencies): Philippines anüolen tiplen hon atudak yimtsüng ka nung anentsüh aluba sülen ghonda 60 shi lir Hokolbarnü tanur ka taküm lia ngutetogo, koba sayatenya ka ama züngsihir, kechiyong teküzmükertemi nisung taküm lia ngutettsübo timla kecha maliasü.

Anentsüh agi yimtsüng ka anenbangba sülen samara alir 100 dak tema rongnung Hokolbarnü kümzükla tetsür chanula ya-a densema liasü. Iba lendong nung nisung 15 bo süogo.

Masara yimtsüng nung teküzmükertemi shovel aser teka amshia taküm alirtem bushiba mapang la nguteta liasü, ta Davao de Oro province nungi disaster agency ketdangsür Edward Macapili-i AFP dang ashi.

"Iba ya saytenya ka lir," ta Macapili-i ashiba den teküzmükertemi tang tashi

monguteti alirtem ajak sür alitsü ta bilema liasü, ta shisem.

"Iba ajanga teküzmükertem nem timla agütsüogo," ta paisa shisem.

Teküzmükertemi iba tetsür janula lishi agi nübanger jeba ajunger aoba video ka Facebook nung lemsatepogo.

"Social media nung prokshiba video ajanga tanutsüla ya reprangtetsüsabo yirur maliasü ta nguogo," ta Macapili-i ashi.

Paisa, tetsürla tebu den ajurutepba sülen la temang tendangtsü atema mozükidangi anir oa liasü, ta ashi.

Anentsüh yagi Masara yimtsüng Mongolbar aonung kongshia liasü. Anentsüh yagi ki aika aser hon atudak inyakterem anir aotsü atema anena aliba bus asem tashi anenbanga liasü.

Lendong nung tang tashi nung nisung 15 asüba jangjaogo aser 31 yirur lir aser nisung noklang dak tema tang tashi monguteti lir.

Russia aser Ukraine na tepuokertem melentep

Abu Dhabi, Tsüklai/February 9 (Agencies): United Arab Emirates teyongtsüi ia Russia aser Ukraine na tepuoker (prisoners of war) noklang kaka melentepogo.

Tepuokertem kanga takok ngua melentepba indang sangdongba mapang UAE indang nation's Ministry of Foreign Affairs-i Hokolbarnü ashiba agi, rara anentsü aser sensaksemtsü asoshi ayongzüka aruba mapang Moscow aser Kyiv na tsüngda tangatettep ka dangi arudaktsütsü atema December ita nungi tenzüker tang agi tasembenbuba UAE teyongtsüi inyaksangshiogo

Ukraine Tir Volodymyr Zelenskyy-i, tepuokertem maneni melenteptsü atema par linüki takokba tashi jenjang agitsü ta ashiba Hokolbarnü X sabang ajanga metetdaksü.

Russia indang Ministry of Defence-ia Telegram ajanga UAE teyongtsüi ia tepuokertem takok ngua mlentepba lemsatepogo.

Tang tashi nung Ukraine nung tepuoker 3,135 Russia-i pur orr aliba chiokogo, ta Zelenskyy-i Brehostibar aonung social media ajanga

metetdaksü.

Ukrainian Ministry of Defence nung intelligence directorate tekolakba Kyrlyo Budanov-i, Ukraine nungertem dang, iba inyakyim ya kanga tebenja lir anungji mapang talangka agiba atema tezü danga malitsü ayongzüko.

"Mapang tatsükabo agiba nenokia nguogo, saka takok ngua inyaktetra aji dang tongtibang," ta Budanov-i ashi.

January ita linük ana tsüngda tepuoker 195 melentepa liasü, koba Russian military transport tayimtsü ka tsükokba sülem mezüngbuba liasü. Moscow-i ashiba agi iba tayimtsü nung Ukraine nung sepa 65 mena liasü.

Il-76 transport tayimtsü ya Russia kübok Belgorod tesem nung tsükoka liasü. US indang Patriot missile ka amshia iba tayimtsü khazüka yokba atema Russia tir Vladimir Putin-i Ukraine aija liasü. Iba dak sendakba nung Ukraine-i kecha telangzüba magütsü.

Rara tenzüka sülen linük ana tsüngda mapang shia tepuokertem melentepa aruogo, ajisüaka January 3 nü UAE teyongtsüi ia tepuoker 478 melentepba ya tang tashi nung ajak dang timtiba lir.



Poland nungi 70buba Miss World Karolina Bielawska (teyong) aser Jamaica nungi taoba Miss World Toni-Ann Singh, India nungi Manushi Chillar, Puerto Rico nungi Stephanie Del Valle aser Mexico nungi Vanessa Ponce de Leon nung New Delhi nung Miss World official press tenzüka sentong nung tangokba noksa nung angur.

Y. Patton-i 29buba Chakhesang Wrestling championship moatsü



Dimapur, Tsüklai/February 9 (TYO): 29buba Chakhesang Wrestling aser 3buba under 16 Years Championship lapokba sentong nung Deputy Chief Minister, Nagaland Y. Patton alakteta jaoker liasü.

Iba asayamung ya Local Ground, Chozuba nung February 9 nü tenzükogo.

Sentong nung Y. Patton-i Angami aser Chakhesang wrestling association dang Nagaland nung tanga kintem nema iba asaya sayutsü ajungshi, ajita asünungdang item kintem yagi asayamung balala nung shilem agitettsü aser ayongzüka-a asayatettsü, ta ashi.

Wrestling asaya ya tetoktepba den külemi iba ajanga telongjem adokdaksür. Patton-isa iba asaya reprangtsü atema pa jaokba atema kanga pelaba lemsatapa liasü.

Deputy Chief Minister shibai

Home portfolio dena bena lir, pai MLA Kudecho Khamo-i mepeshiba ama Police Outpost, Chozuba ya Officer Incharge (OC) nungi SDPO jenjangi ajungkettsüstenangzüka agüja liasü.

Asayamung lapokba sentong nung Advisor, Civil Administration Works Division & Taxes Kudecho Khamo mejeta jaoker liasü. Khamo-i, nüburtem nem longjemer Tsüngrem tenüng asangtsü atema maongka agütsüba atema tulusang Tsüngrem dang kanga pelaba lemsatap. Paisa, tesemdangertem pelashishia jaokba den asayartem ajak asayamung nung junga asayatsü imla ataba lemsatap. Advisor-isa, Chief Minister, Neiphiu Rio-i, lanurtem asoshi saisapong ajungkettsüstenang merangdar ta ashi. Pai, sentepa aliba lokti dang libaliro jenjang ajungkettsü atema kibong shia

nung project balala tenzüktsü ajungshia liasü. Maneni sentong nung mezüngbuba Chakhesang Wrestling champion (1968) Pudusa Chizho-i asayamung indang wako salatsü aser iba sülen defending champion-i asayamung milenpong tsükloktsü aser asayartem tenangzüktepba agiba sentong agia liasü. Reigning champion Venuzo Dawhuo aser reigning U-16 champion Thuputha Hesuh na milenpong abener liasü aser Chizho-i milen tsüklokja liasü.

Iba asayamung nung senior wrestler 50 aser U-16 wrestler 6-i shilem agia liasü. Wrestler tem ya CWA kübok Chorkri Area Wrestling Association, Chozuba Range Wrestling Association, Phek Area Wrestling Association aser Secheku Wrestling Association nungi lir.

Anurag Thakur-i Testing Centre for Health Supplements lapoktsü

Tsüklai/February 9, 2024 (Agencies): Asayartem chiyongtsü temenen achiba koba ajanga dope test majangteter item amala nungi pila toktsüstenang atema Hokolbarnü Sports Minister Anurag Thakur-i Gandhinagar nung Centre of Excellence ka lapoktsüogo.

Minister-i National Forensic Sciences University (NFSU) Gandhinagar, Gujarat nung Centre of Excellence for Nutritional Supplements Testing for Sportspersons (CoE-NSTS) ya virtually lapokja liasü.

Asayartem asayamung tulutem atema renemba mapang chiyongtsü tajungtibatem dang agütsüstenang asoshi CoE-NSTS-i chiyongtem tendangtsü.

"Paris Olympics indang jembiba mapang ashitsü ajak agi kümdanga, meremereka

aser temzüng ozüng sülen anidaka asayang. Iba atema tangazükba agütsüstenang kanga tongtibang. Awareness dak alia asayartem atema facility tapet agütsüstenang," ta Thakur-i, 'Road to Paris 2024: Championing Clean Sports and Uniting for Anti-Doping' conference mapang ashi.

"Tang tashi nung nutritional supplements tendangtsü atema facility ka danga maliasü. Tang ka amenokogo. Anungji gym, power enhancer tem nung supplement temenentem lira itemjia tendangtetsü. Asayartem parnok tajungba asayatettsü atema jenjang aketba supplement tem alia chitettsü.

Tenokdangba agütsüstenang aliba mozü achiba ya India nung asaya ajak nung tenokdangba

agütsüstenang lir. Tendangba mapang asayartem aikati jenjang maketba supplement aser mozütem aibelena achiba ajanga parnok dak tenokdangba agütsüstenang aliba mozütem poteter ta shia arudar.

Fair play dak sendakba nung Thakur-i ashiba agi, integrity ji kanga tongtibang aser linüki taküm July aser August ita Paris Olympic Games nung tajungtiba asayaner.

Paisa, CoE-NSTS ya inyakyim ajak ochishia aotsü atema facility tem amenokyonga aoba nung jenjang ka lir

Minister-isa, CoE-NSTS amenokba ya India nung nutritional supplement testing facilities amenoktsü asoshi ministry nukjidong aliba nung shilem ka lir, ta ashi.



Jammu and Kashmir nungi Differently-abled Indian cricket team New Delhi nung India aser England na T20I championship trophy bener tangokba noksa nung angur.

SAI-i Khelo India asayartem atema sen crore 30.83 dak tema agütsüogo

Tsüklai/February 9, 2024 (Agencies): Sports Authority of India (SAI)-i, 2023-24 financial year atema Khelo India Scholarship Scheme kübok sen crore 30.83 agütsüogo, kong Quarter 4 atema Khelo India Athletes 2571 atema Out-of-Pocket Allowance (OPA) sen 7,71,30,000 densema lir.

2023-24 atema Quarter 4 indang sen yagi 2024 küm January nungi March tashi ayimjemtsü aser 2023-24 atema Q1, Q2, Q3 aser Q4 asoshi asayartem nem agütsüstenang 30,83,30,000 asütsü.

Khelo India Scheme indang long term development program nung shilem ka ama asayar 3000 shi Khelo India athletes ama shimer lir aser pranok nem küm

nung asayar shia nem out-of-pocket allowance sen 1,20,000 agütsüstenang. Iba den bendenloksema asayar ajak nem training aser tetoktepba mapang intoktsü atema sen lakh 5 agütsüstenang.

Asayar 3000 shi shirnok Khelo India scheme nung shilem ka lir, parnok nem training, coaching, diet, kitting, medical insurance, kits, aser out of pocket allowance ama sen lakh 6.28 annual scholarship agütsüstenang.

Khelo India asayartem nem 2023-24 atema agütsüstenang sen:

- Q1- 2848 KIAs - Rs. 7,36,70,000
- Q2- 2684 KIAs - Rs. 7,81,10,000
- Q3- 2663 KIAs - Rs. 7,94,20,000
- Q4- 2571 KIAs - Rs. 7,71,30,000.

Fraser-Pryce Paris Olympics sülen asaya nungi anentsü

Tsüklai/February 9, 2024 (Agencies): Jamaica tsür asemteper Shelly-Ann Fraser-Pryce shibai Olympics asem tashi nung gold medal aser world championship 10 ben koka lir la taküm Paris Olympics tembangba sülen asaya nungi anentsü ta shiogo.

American magazine Essence den sensaksemba mapang Fraser-Pryce-i ashiba agi, la lar kibong den mapang timba intoktsü atema arishi küm 37 nungbo asaya nungi anentsü merangdar.

"Kü jabaso-i ni nungdaker," ta Fraser-Pryce-i Magazin dang ashi. "Ni 2008 küm takok mangu tsüngda kübuba küna külemi liasü. Pai ni atema bendanga agütsüstenang. Küna ta partnership ka aser team ka lir," ta laisa shisem.

"Iba amala teyari agütsüstenang ajanga ni tang tashi kechi inyaka arudar aji inyakteter aser tang parnok nem meyipa agütsüstenang mapang lir," ta Pryce-i ashi.

La tang France nung tatembangbuba Olympic nung

takok angutsü atema training dak rangloker inyakba mapang ka lir, koba Fraser-Pryce-i ashiba agi, takokba tashi inyaka nüburtem dang nai kodang telemtetba agidir idangji anener ta sayutsü atema lir.

"Ni kü mulungka nung dang asaya nungi anener," ta lai ashi Fraser-Pryce-i Olympics nung medal ti ngua lir, kong 2008 küm Beijing aser London nung 100-meter asemtepba nung gold medal anguba aser Tokyo Olympics nung Jamaica indang 4x100 relay team nungi gold medal anguba densema lir.

Laisa, Tokyo Olympics nung 100m asemtepba nung shiler medal, London nung 200m asemtepba nung silver aser 2016 küm Rio nung 100m asemtepba nung bronze medal anguba densema lir.

Lai 2009, 2013, 2015, 2019 aser 2022 küm 100m world titles benogo aser 2013 küm 200m asemtepba nung gold aser 2009, 2013, 2015 aser 2019 küm 4x100 relay nung gold medal nguogo.



Goa nung 6 buba National Masters Games 2024 saisapong sentong nung arishi küm 65 tema tain teburtem 100 metres asemtepba nung mezüng takok jenjang gold medal angusang Akhoya nunger A.Toshi Jamir noksa nung angur. (Feb 09, 2024.)

BILEMDANGANG
"Amajok watidak nü mapang tintok."